



Bosna i Hercegovina
Federacija Bosne i Hercegovine
Kanton Sarajevo
OPĆINA VOGOŠĆA
OPĆINSKI NAČELNIK



Vogošća, ul. Jošanička br. 80, tel: 00387 33 586-411

**PRAVILNIK
O USLOVIMA, NAČINU I KRITERIJIMA ZA DODJELU SREDSTAVA VJERSKIM ZAJEDNICAMA**

Vogošća, maj 2025. godine

Na osnovu člana 15. Zakona o principima lokalne samouprave u Federaciji Bosne i Hercegovine ("Službene novine Federacije BiH", broj 49/06 i 51/09), čl. 71. i 125. Statuta Općine Vogošća – („Službene novine Kantona Sarajevo“, broj 27/14 – Prečišćeni tekst i 14/15, 9/20 i 23/24), a u vezi članom 18. Odluke o izvršavanju Budžeta Općine Vogošća („Službene novine Kantona Sarajevo“, broj: 1/25) i tačkom 5. Smjernica o minimalnim standardima dodjele proračunskih sredstava putem transfera i subvencija u Federaciji Bosne i Hercegovine („Službene novine Federacije BiH“ 37/24) Općinski načelnik donosi,

PRAVILNIK O USLOVIMA, NAČINU I KRITERIJIMA ZA DODJELU SREDSTAVA VJERSKIM ZAJEDNICAMA

Član 1. (Predmet Pravilnika)

Ovim Pravilnikom utvrđuju se uslovi, način i kriteriji za dodjelu sredstava vjerskim zajednicama iz Budžeta Općine Vogošća (u daljem tekstu: Općina).

Član 2. (Uslovi za ostvarivanje prava)

- (1) Sredstva iz člana 1. ovog Pravilnika dodjeljuju se vjerskim zajednicama koje imaju sjedište ili izgrađene vjerske objekte na području Općine.
- (2) Izuzetno od odredbi iz stava (1) ovog člana sredstva se mogu dodijeliti i vjerskim zajednicama koje nisu na području Općine, ali su od značaja za redovno obavljanje vjerskih obreda lokalnog stanovništva.

Član 3. (Način ostvarivanja prava)

- (1) Sredstva iz člana 1. ovog Pravilnika dodjeljuju se putem Javnog poziva i podnesenih zahtjeva po istom.
- (2) Zahtjeve iz stava (1) ovog člana podnose vjerske zajednice na propisanom obrascu, a koji je sastavni dio Javnog poziva.
- (3) Javni poziv raspisuje općinski načelnik putem nadležne Službe, a isti se objavljuje na web stranici Općine.
- (4) Javni poziv ostaje otvoren do kraja kalendarske godine, odnosno do iscrpljenja sredstva za ovu namjenu.
- (5) Zahtjevi se dostavljaju službi nadležnoj za vjerske zajednice (u daljem tekstu: Služba) putem protokola Općine ili putem pošte.
- (6) Zahtjeve iz stava (5) ovog člana razmatra nadležna općinska služba.
- (7) Služba, nakon razmatranja prijava, općinskom načelniku dostavlja prijedlog za raspodjelu sredstva.
- (8) Općinski načelnik donosi konačnu odluku, na osnovu koje se potpisuje Sporazum ili Ugovor o dodjeli sredstava.
- (9) Na osnovu Sporazuma/Ugovora nadležna služba za finansije vrši isplatu sredstva.

Član 4. (Kriteriji za dodjelu sredstava)

- (1) Sredstva iz člana 1. ovog Pravilnika raspodjeljuju se vjerskim zajednicama za projektne i druge aktivnosti, i to:
 1. Institucijama IZ u BiH – Medžlis IZ Sarajevo;
 2. Institucijama Katoličke crkve u BiH – Vrhbosanska nadbiskupija;
 3. Institucijama SPC u BiH - Mitropolija Dabrobosanska;

- (2) Sredstva iz stava (1) ovog člana dodijeljuju se za:
- a) građevinsko – zanatske radovi, sanacije, ili rekonstrukcije postojećeg vjerskog objekta ili dijela objekta, kao i izgradnja – dogradnja novog objekta ili dijela objekta;
 - b) organizacija vjerskih praznika, blagdana, manifestacija, vjersko – kulturnih i prosvjetnih događaja, tribina, okruglih stolova, te raznih oblika i vidova prezentiranja stvaralaštva vjerske zajednice, kao i štamparsko – izdavačke, prevodilačke aktivnosti, režijske troškove i druge aktivnosti.
- (3) Prednost za dodjelu sredstava kapitalnog granta imaju vjerski objekti sa područja Općine Vogošća, te oronuli, dotrajali objekti koji imaju status kulturno historijskog naslijeđa ili su pod zaštitom države, kao i objekti čije stanje ugrožava sigurnost imovine i lica.
- (4) Ukoliko neka od vjerskih zajednica iz stava (1) ovog člana ne dostavi svoje zahtjeve na Javni poziv Služba može predložiti preraspodjelu sredstva na druge vjerske zajednice, u skladu sa dostavljenim zahtjevima.
- (5) Na osnovu ovog Pravilnika sufinansirati/finansirati će se aktivnosti koje se implementiraju tokom godine za koju je raspisan Javni poziv.

Član 5. (Eliminatorni kriteriji)

- (1) Služba neće razmatrati zahtjeve za dodjelu novčanih sredstava onim vjerskim zajednicama koje nisu u skladu sa Odlukom o izvršenju budžeta Općine dostavile izvještaj o utrošku novčanih sredstava za prethodnu godinu.
- (2) Služba neće razmatrati zahtjeve čija vrijednost prelazi iznos ukupno planiranih sredstava u Budžetu za ove namjene bez dokaza o obezbjeđenju dodatnih sredstava od strane drugih donatora.

Član 6. (Potrebna dokumentacija)

- (1) Zahtjev za dodjelu sredstava - detaljno obrazložen, sa preciznim informacijama o projektu, sa predmjerom i predračunom radova, planiranim aktivnostima, namjeni sredstava (sanacija, rekonstrukcija, druga namjena),
- (2) Potrebne dozvole i saglasnosti (urbanističke, građevinske, i sl.) ukoliko se radi o radovima koji podrazumijevaju ovakvu vrstu dokumentacije,
- (3) Dokaz o obezbjeđenju dijela sredstva (ukoliko su u pitanju građevinski radovi vrijednosti preko 80.000 KM),
- (4) Uz zahtjev za dodjelu sredstva iz člana 4. stav (2) tačka b), vjerske zajednice su dužne dostaviti projekat sa kojim apliciraju za novčanu podršku, odnosno navesti naziv projekta, cilj, aktivnosti, planirano vrijeme realizacije, očekivani broj učesnika, mjesto realizacije, budžet planiranih aktivnosti sa jasno definisanim budžetskim stavkama i pojedinačnim iznosima.
- (5) Ukoliko se zahtjev odnosi na sufinansiranje režijskih troškova potrebno je dostaviti projekciju troškova na godišnjem nivou za svaku komunalnu uslugu pojedinačno.
- (6) Bankovna instrukcija za plaćanje (potvrda o broju tekućeg računa vjerske zajednice).

Član 7. (Praćenje i izvještavanje)

- (1) Izvještaje vjerskih zajednica obrađuje i prati nadležna općinska služba.
- (2) Služba je dužna redovno izvještavati općinskog načelnika o pristiglim izvještajima, sadržaju i ispravnosti izvještaja.

Član 8.
(Finansijska sredstva)

Finansijska sredstva za realizaciju ovog Pravilnika utvrđuju se Budžetom Općine Vogošća za svaku kalendarsku godinu.

Član 9.
(Stupanje na snagu i objava)

Ovaj Pravilnik stupa na snagu narednog dana od dana objave na Oglasnoj ploči i web stranici Općine Vogošća.

OPĆINSKI NAČELNIK
Migdad Hasanović

Broj: 03-42-559/25
Vogošća, 19.05.2025. godine

OBRAZLOŽENJE

Pravni osnov za donošenje ove Pravilnika je:

- član 15. Zakona o principima lokalne samouprave u Federaciji Bosne i Hercegovine ("Službene novine Federacije Bosne i Hercegovine", br.49/06 i 51/09) i član 71. i 125. Statuta Općine Vogošća – („Službene novine Kantona Sarajevo“, broj 27/14 – Prečišćeni tekst i 14/15, 9/20 i 23/24) kojim je određena nadležnost Općinskog načelnika za donošenje pojedinačnih i općih akata iz samoupravnog djelokruga općine.
- tačkom 5. Smjernica o minimalnim standardima dodjele proračunskih sredstava putem transfera i subvencija u Federaciji Bosne i Hercegovine („Službene novine Federacije BiH“ 37/24) definisana je obaveza primjena Smjernica od strane lokalnih zajednica.

Razlozi donošenja

Donošenjem Smjernica o minimalnim standardima dodjele proračunskih sredstva putem transfera i subvencija u Federaciji Bosne i Hercegovine pojavila se potreba usklađivanja postojećih akata i donošenja novih u procesima koji nisu bili definisani pravilnicima ili odlukama lokalnih zajednica.

Općina Vogošća izdvaja značajna sredstva za finansiranje vjerskih zajednica, kroz sanaciju objekata i podršku vjerskim programima i aktivnostima. Cijeneći činjenicu da ovaj proces treba imati svoj pravni okvir kojim će se obezbijediti i definisati kriteriji, uslovi i način dodjele pristupilo se izradi Pravilnika. Na ovaj način dodjela sredstva vjerskim zajednicama će biti transparentnija, raspoređivanje sredstva će biti objektivnije, a sam proces dodjele sredstava efikasniji.

Predložena rješenja

Član 1. – definiše predmet Pravilnika;

Član 2. - propisuje uslove za ostvarivanje prava;

Član 3. – propisuje način ostvarivanja prava;

Član 4. – definiše kriterije za dodjelu sredstava;

Član 5. – propisuje eliminatorne kriterije;

Član 6. – propisuje potrebnu dokumentaciju za ostvarivanje prava;

Član 7. – propisuje način praćenja i izvještavanja;

Član 8. – definiše način finansiranja;

Član 9. – reguliše stupanje na snagu;

Finansijska sredstva za provođenje ovog Pravilnika planiraju se u budžetu Općine Vogošća.